

# Ulangtahun Indonesia merdeka: Seri Paduka, PM hantar tahniah

Bahan asal dari Arkib

Negara Malaysia

**KUALA LUMPUR, Isnin** — Seri Paduka Baginda Yang di-Pertuan Agong dan Perdana Menteri, Datuk Seri Dr. Mahathir Mohamad hari ini, menghantar perutusan tahniah kepada Presiden Soeharto sempena hari kemerdekaan Republik Indonesia ke-36.

Seri Paduka Baginda dalam perutusannya bertitah:

"Kami berdoa agar di bawah pimpinan Paduka Yang Mulla, Republik Indonesia akan terus mencapai kemajuan dan kejayaan demi kemakmuran dan kebahagiaan seluruh rakyat."

"Semoga Allah tetap memelihara kesihatan Paduka Yang Mulla untuk terus memimpin negara dan rakyat Republik Indonesia."

Perdana Menteri, Datuk Seri Dr. Mahathir Mohamad pula dalam perutusannya berkata: "Saya dengan sukacita menyampaikan salam dan ucapan selamat yang tulus ikhlas bagi pihak kerajaan dan seluruh rakyat Malaysia dan bagi diri saya sendiri kepada Paduka Yang Mulla, pemerintah dan rakyat Indonesia sempena hari ulang tahun kemerdekaan Republik Indonesia ke-36.

"Sebagai negara jiran tetangga, kami turut serta bergembira pada hari yang berbahagia ini."

Perdana Menteri gembira, perkembangan persaudaraan dan kerjasama rapat di antara Malaysia dan Republik Indonesia.

"Saya yakin, perhubungan rapat ini akan tetap dipelihara dan diperkukuhkan di tahun-tahun akan datang bagi kepentingan kedua negara kita.

"Saya berdoa semoga Allah melimpahkan rahmat kepada pimpinan Paduka Yang Mulla di dalam segala usaha untuk mengekal dan membangunkan kemerdekaan Republik Indonesia."

Menteri Hal Ehwal Luar, Tan Sri Ghazali Shafie turut menghantar ucapan tahniah kepada Menteri Luar Indonesia, Prof. Mochtar Kusumatmadja.